

Mr Darren Millar AC
Cadeirydd y Pwyllgor Cyfrifon Cyhoeddus
Cynulliad Cenedlaethol Cymru
Bae Caerdydd
Caerdydd CF99 1NA

Dyddiad: 8 Ionawr 2015
Ein cyf: HVT/2255/fgb
Tudalen: 1 o 2

Annwyl Darren

**YMATEB LLYWODRAETH CYMRU I ADRODDIAD Y PWYLLGOR CYFRIFON CYHOEDDUS
AR GYFLOGAU UWCH REOLWYR**

Mae'r clercod wedi gofyn am fy nghyngor ar ymateb Llywodraeth Cymru i adroddiad y Pwyllgor ym mis Tachwedd 2014 ar *Gyflwgau Uwch Reolwyr*. Mae Llywodraeth Cymru'n derbyn pob un o'r 23 o argymhellion a wnaed gan y Pwyllgor.

O edrych ar ymateb Llywodraeth Cymru, mae'n glir y bydd llawer o'r gwaith a gaiff ei wneud i roi argymhellion y Pwyllgor ar waith yn cael ei gynnwys yn y gwaith sydd ar droed eisoes er mwyn datblygu polisi cyflogau sector cyhoeddus Cymru ac fel rhan o'r rhaglen o ddiwygio llywodraeth leol. Mae Llywodraeth Cymru wedi helpu drwy ddatgan yr amserlenni disgwylidig ar gyfer y gwaith ehangach hwnnw. Fodd bynnag, nid yw'n gwbl glir i ba raddau fydd y gwaith a gaiff ei wneud yn cynnwys yr holl sectorau sy'n dod o dan adroddiad y Pwyllgor, er bod Llywodraeth Cymru wedi dynodi y bydd yn darparu diweddariad yn dilyn penderfyniad ar gwmpas gwaith polisi cyflogau'r sector cyhoeddus yng Ngwanwyn 2015.

Ceir rhai materion y bydd y Pwyllgor yn dymuno adlewyrchu arnynt o bosib wrth ystyried a yw'n fodlon ar hyn o bryd ag ymateb Llywodraeth Cymru. I ddechrau, mae'r ymateb i *Argymhelliad 6* yn awgrymu y bydd Llywodraeth Cymru'n ymgymryd â gwaith i adolygu'r trefniadau monitro cysylltiedig â Chyfarwyddiadau Cyfrifo ac i sicrhau cydymffurfiaeth â gofynion datgelu tâl ddiwedd Hydref 2015. Efallai na fydd hyn yn ddigon i sicrhau gwell cydymffurfiaeth a chysondeb mewn sectorau unigol wrth gyflwyno cyfrifon ar gyfer blwyddyn ariannol/academaidd 2014-15, yn enwedig o ran addysg uwch, addysg bellach a landlordiaid cymdeithasol cofrestredig. Efallai y bydd y Pwyllgor yn dymuno cael rhagor o wybodaeth am sut bydd Llywodraeth Cymru'n ceisio sicrhau cydymffurfiaeth sylfaenol a dehongli cyson o ran y cyfarwyddiadau cyfrifo presennol yn y sectorau hyn yn y tymor byr, er gwaethaf cwmpas unrhyw newidiadau yn y dyfodol i'r cyfarwyddiadau hynny sy'n codi o waith polisi cyflogau'r sector cyhoeddus.

Ar bwynt cysylltiedig, mae Llywodraeth Cymru wedi dynodi wrth ymateb i nifer o argymhellion y Pwyllgor y bydd yn ysgrifennu at awdurdodau lleol er mwyn tynnu eu sylw at adroddiad y Pwyllgor. Er y bydd datblygu gwaith polisi cyflogau'r sector cyhoeddus yn cymryd peth amser yn anochel, gallai Llywodraeth Cymru fod wedi helpu drwy ymrwymo rhywfaint o gyfathrebu ehangach am adroddiad y Pwyllgor yn y tymor byr. Yn benodol, gallai Llywodraeth Cymru annog y sectorau hynny sy'n dod o dan yr adroddiad i ystyried ei ganfyddiadau a'i argymhellion cyn unrhyw ganllawiau a gofynion manylach sy'n codi o'r gwaith polisi ar gyflogau'r sector cyhoeddus.

Er bod yr ymatebion i'r rhan fwyaf o argymhellion y Pwyllgor yn cyfeirio at yr amserlenni ar gyfer ymateb i weithgarwch, nid yw'r ymateb i *Argymhelliad 7* yn dynodi amserlen benodol, boed yn unol â'r rhaglen o ddiwygio llywodraeth leol neu ar wahân iddi.

Gan fod Llywodraeth Cymru eisoes wedi cynnig darparu diweddariadau pellach ar rai materion penodol yn y tymor byr a chanolig, efallai yr hoffai'r Pwyllgor wneud cais am ddiweddariad llawn ar y camau gweithredu mewn ymateb i'w argymhellion tua diwedd 2015 neu ar ddechrau 2016. Bydd hyn yn galluogi'r Pwyllgor i bwysu a mesur y cynnydd sydd wedi'i wneud cyn diwedd y pedwerydd Cynulliad. Gobeithio hefyd y bydd y Pwyllgor yn cael cyfle bryd hynny i ystyried y wybodaeth ddiweddaraf ar gyflogau uwch y mae Llywodraeth Cymru wedi ymrwymo i'w chasglu a'i chyhoeddi fel ymateb i *Argymhelliad 23* yn adroddiad y Pwyllgor.

Yn olaf, mae Llywodraeth Cymru wedi nodi y bydd sut bydd staff y Comisiwn Staff Gwasanaethau Cyhoeddus arfaethedig yn helpu gyda chyflwyno'r ymateb i adroddiad y Pwyllgor yn dibynnu ar y penderfyniadau ar ei rôl, ei gylch gorchwyl a'i raglen waith. Daw'r cyfnod ymgynghori ar y Comisiwn i ben ar 13 Ionawr 2015. Felly, efallai yr hoffai'r Pwyllgor ystyried gwahodd Llywodraeth Cymru i roi diweddariad yn y cyswllt hwn, cyn gynted ag y gwneir y penderfyniadau hynny.

Gobeithio bod y cyngor hwn o ddefnydd i'r Pwyllgor.

Yn gywir



HUW VAUGHAN THOMAS
ARCHWILYDD CYFFREDINOL CYMRU